

四庫全書

集部

欽定四庫全書

西巖集卷十三

元 張之翰 撰

表

傳國璽表

王者登極必有受命之符天下藏珍須待應誠而至一

朝進瑞萬宇騰歡恭惟

依式

明燭無疆密應有感承百王

之正統嗣累世之洪休始青宮則付金寶於軍前未紫宸則出玉璽於都下璽本從土是應任爾土之兆玉初

稟陽是應居正陽之尊豈人力之所能信天命之有在
卞和獻而李斯篆已千餘年楊桓辨而崔斌言又一再
得虹氣蟠空而不散螭文壓際以仍存臣某等遠牧松
江久辭楓陛敬祝永昌之壽喜聆傳國之名仰煥乎八
字之文咸稱神妙願主以六人之職益鎮昇平

賀登極表

天命神器有歸古無久曠聖人大寶曰位今覩新登凡
屬統臨舉深欣戴依式勇智天錫聰明日躋先授儲宮之

寶符復得傳國之玉璽父稱帝母稱后式彰純孝之誠
詔有令赦有恩迓續隆平之治臣等叨分郡寄企想朝
儀瞻北闕九重莫與龍飛之會祝南山萬壽願伸虎拜
之恭

改元元貞賀表

受命維新繼正統為正朔履端於始改元貞為元年萬
國昭宣羣情抃蹈中賀精感天地功光祖宗體四德之純
乾當三陽之交泰下地出吉符豈元狩之可比上位定

大寶非元鼎之相侔臣某等寸心戀闕千里專城恭行
寬大之書親際盛明之世想文武班聯之嘉會天遠九
重同吏民鼓舞之歡聲山呼萬歲

賀皇太子表

子恃母慈乃受圖于四海母由子貴而正位于內朝孝
治有光尊親莫大恭惟中賀躬履節儉性順柔雍夙贊明
孝之先皇誕生睿哲之嗣帝謹畏深抑有唐憲之遺風
端慤誠莊備周任之全德付八字傳國之寶成五色補

天之功宜揚萬國之徽音允極九州之富養臣某等喜
逢盛事承乏遠方玉輅金車阻觀禮萬安殿上珠庭日
角想承顏長樂宮中

議

楮幣議

天下之患莫患于財用之不足財用之患莫患于楮幣
之不實夫楮幣裁方寸為飛錢敵百千之實利制之以
權權非不重也行之以法法非不巧也然未有久而不

澀滯者惟在救之何如爾自中統至今二十餘年中間
姦臣柄國惟聚斂貿易是務其數十倍于初楮日多而
日賤金帛珠玉等日少而日貴蓋不知稱提有致也問
稱提有策乎曰有今南北混一此楮必用不過自上貴
信之爾如出金以兌換使之通行一策也鑄錢以表裏
使之折當二策也造鈔以更新使之收買三策也愚見
若此未審可否惟詳擇焉

議盜

竊思盜者古今之通患去盜之術無他使斯民崇本而
已昔一夫受田百畝力穡作勞春耕秋穫惟知仰事俯
育奚暇他及是以非意不萌戾心不起盜何從而發今
盜賊繁多在淮及北且未論觀南方歸附以來負販之
商游手之輩朝無擔石之儲暮獲千金之利始則茶商
終則因茶而為盜始則鹽商終則因鹽而為盜始則銅
鐵鉛礬之商終則因銅鐵鉛礬而為盜始則海運之夫
蕃船之商終則因海運蕃船而為盜皆由逐什一之利

終不免為盜賊之歸是天下之盜常起於利孔之一誘故一旦去本趨末舍農為商因商作盜或聚集於山林或剽掠於江海而又誘饑寒逃散之民并作過經斷之黨相附而為盜雖致之之由不同所以為害一也近者省劄旁午臺文絡繹一則責軍官二則責民官至於罰至於杖其治盜之法可謂嚴且急矣然法日重而盜日多其故安在蓋治盜不如弭盜責官不如選官何謂弭盜教販商以務農散梢水以作民撫流移以復業拘刺

斷以供役非弭歟何謂選官布循良以典郡去貪暴以
遠民用智謀以主兵間承襲以備員非選歟雖然曰弭
曰選本也可緩不可急曰禁曰捕標也可急不可緩今
強盜劫某處竊盜生某處鎮守者固無所逃罪問之撫
字者汝何為而致此邪必曰某無龔遂之便宜何以罷
渤海之盜某無趙廣之擅誅何以制潁川之盜某無虞
詡之伏兵何以擒朝歌之盜而況有案牘之勞形有錢
糧之掣肘有獄訟之焦心每遇盜賊不過率領縣尉巡

檢一二人縣尉巡檢不過率領弓手三二十人彼賊衆多動百千寡不敵衆弱不敵強但束手待斃而已且殘民者賊也禦賊者軍兵也土官不能遣軍而鎮守遣之良民不敢執兵器而賊徒執之如此而望盜止賊息是北轅適楚南轅適燕必無濟事亦明矣為今之計必欲罪軍官亦及民官凡有鎮守官處除出征調度不得干預其餘賊發火起之事許路府州縣達魯花赤長官依服裏兼管與魯例一同提調區處無分彼我城郭内外

元有軍鋪除已設外更許增置仍摘管其地斟酌頓放
南北軍人相參巡警及無軍鋪之處從本管官司保結
驗人煙多少官為量給有印烙鑒記軍器不過數十件
令純實之家收掌以備不虞亦目下治盜之大端也必
欲禁止消弭其澄源正本之術不可不講然此伏慮所
擬未盡伏乞照詳

議科舉

自國家混一以來凡言科舉者聞者莫不笑其迂闊以

為不急之務愚獨謂不然蓋自古忠臣烈士名卿賢大夫未有不由此乎出竊見比年老師宿儒彫落殆盡後生子弟無所見聞稍稍聰明者不為貼書必學主案今年一主案貼書明年一州胥府吏今年一州胥府吏明年一部掾省雜不數年之間內而省部臺院外而府州司縣出身一官人矣習以成風莫之能革豈有煌煌大元土地如此其廣人民如此其繁官吏如此其衆專取人於此求其所謂經濟之學治安之策果有耶無耶愚

所不知也為今之計莫急於科舉科舉之目曰制策曰明經曰賦義曰宏詞在議擇而行之果人知所學將見賢才輩出建立太平可為聖朝萬世之光也

序

夢會圖詩序

唐元和中元稹為御史鞠獄梓潼白居易昆仲送至城西而別後旬日白昆仲游曲江及慈恩寺酒半酣作詩有忽憶故人天際去計程今日到梁州之句又旬日得

元書果以是日至褒仍寄詩曰夢君兄弟曲江頭也到
慈恩院裏游驛吏喚人排馬去忽驚身在古梁州千里
魂交若合符契天聖寶元間石曼卿以歌詩豪於時嘗
於平陽會中代作寄尹師魯十年一夢花空委一篇詞
意深美石沒數年故人關詠永言忽夢石曰延年平日
多作詩獨以平陽代意之篇最為得意而世人罕稱之
能令此詩傳世在永言耳詠覺增演其詞隱度入迷仙
引于是天下爭歌之古今名賢以夢相感者固多未有

如沙門澄照德公夢遇東坡之異者也德本性完顏氏
世為遼東盛族金正大己丑年六十一避兵太行之鎮
安寨是歲春夜夢東坡謂德曰吾與若舊有十詞欲書
為他日倍壽賀因命紙德謝不敢當坡曰天與壽其可
辭德就友人都欽求紙欽云璽紙在山當取而送之德
還坡別去且約衣黃時相見德因扣坡今居何地坡曰
主羅帥部語訖失所見而寤既旦欽相過曰夜假寤間
見公索紙今特取至德益驚但不知衣黃與羅部為何

義至元壬申詔天下僧易緇為黃時德一百三歲矣中書左丞張公仲謙以黃羅二贈德是日復有送東坡畫像來者風神飄然與夢中無異上有坡子過題墨蓋坡帥定武時嘗與僧守象相游從及坡南遷象亦示滅宣和癸卯過佐定之帥幕象弟游寧懇求此像過因付之故德之徒稱其師為象後身或者疑之前所謂元之與白石之與關皆平昔以道相同以義相合宜精神感通若此且德之去坡已餘百年果忠義之心尚在英靈之

氣不散有所付託不於吾儒而於彼浮屠何邪余因告之曰坡道大不容才優見忌白首流落僅北歸以沒論同輩中豈無才高學博能撰字說善解莊子者當日動而得謗轉喉觸諱使若輩尚無恙其可語之乎不若訪僧之為樂也抑嘗聞子由謫高安雲庵居洞山聰禪居聖壽寺一夕雲庵夢同子由出迓五祖戒禪師覺以語聰聰曰吾亦夢同去俄得坡書已至奉新旦夕可見子由携兩衲候於城南坡至告以夢事坡曰軾八九歲時

時時夢身是僧往來陝右先妣方娠夢一僧來託宿瘡而眇雲庵驚曰戒陝右人失一目暮年棄五祖來游喜安終於大愚逆數蓋五十年而坡四十有九矣由是觀之則德之遇坡亦奚疑歲在庚寅今行臺御史完顏正父奉臺檄按河東山西諸郡越明年正月七日正父初度也人皆莫能知焚香靜坐獨念劬勞有僧敏東巖偶携一軸來謁乃德公夢遇東坡紀壽之圖也事有所感亦豈徒然正父私自喜明日以實語敏敏甚驚異遂模

二公像於卷首請余序愚謂正父同姓德公者也願學坡公者也適是旦而得是圖是造物者必欲同德之壽繼坡之名也故特書夢事之詳俾觀者有所考也

蘭亭紀異詩序

天地間事事物物未始無定數至於成壞廢興相尋於冥冥有可知者有不可知者蓋在人為與弗為也蘭亭自晉王右軍修楔一帖顯於今近千載矣至元二十九年歲在壬辰浙西廉訪副史王君侯朋益由山陰拜右

軍祠得郡人金氏所捨地初屋數十楹為蘭亭書院將
擇師之賢選子弟之俊秀者教養焉既落成復獲蘭亭
舊扁於古屋煤塵中拂拭觀之乃箕山王侯書與君殆
非偶然觀者無不駭嘆噫箕山東平視右軍鼻祖耳孫
也其致敬固宜即不知二君相去幾何年適姓同名同
事又同箕山乃東平之前身乎東平乃箕山之再生乎
雖未能詰可不謂之定數乎夫姓名偶同者古亦有之
如魯兩曾參趙兩毛遂唐兩韓翃不過並稱於當時豈

比異代符合之若此蘭亭余舊游想清流激湍茂林修竹尚無恙他時再到曲水酌右軍一觴問諸生進學幾人有能談前度分司遺愛者當為君傾耳以聽因讀宋侯庭秀書院記乃異其事而序之詩

貞孝堂詩序

昔共姜之自誓陶嬰之悲歌聞其貞未聞其孝緹縈之上書曹娥之號江聞其孝未聞其貞蓋貞者婦之道孝者女之行凡幾世幾年而有其人平江財賦提舉武仲

舉母夫人曹氏夫諱鐸蚤亡時年三十有五教子訓女
專一自守終身不可奪志非貞乎父母老而無子朝夕
勤恪以盡養生送死之禮非孝乎是宜名堂貞孝為無
媿大參左山商公特書扁其子台符作記翰林鹿庵諸
老賜之詩仲舉復求余題端貞孝婦人女子之大德苟
有其一古猶不泯矧兼之者哉故不辭而書豈特一門
之光將為天下後世為婦為女者勸耶鄆張某序

送元正卿詩序

雞三喔扣門甚急起而視之武城元正卿來訪問奚之
曰敝邑隸高唐郡王今所臨集寧諸郡設黌舍興儒宮
薄賦斂賑貧窮恤鰥寡矜疲癯熙熙然山後一樂土也
走嘗曳裾王門及與府屬元仲臣諸士夫相友善將再
往焉覬名勝賜之詩請序卷首余謂正卿之游久矣雖
生於魯如青齊燕趙梁宋秦陝皆君之南莊北里東堂
西舍也平生明辨智慧重然諾尚氣義何往而不合何
求而不得矧郡王主上之賢駙馬也元氏諸君郡王之

佳賓僚也正卿是行將有餽千日酒與五侯鯖者乎贈
錦繡段與金錯刀者乎其或發揮所蘊裨贊善政求一
置足之地乎否則隆冬敝裘走西北千餘里正馬子才
所謂朔風驚沙枯梢號寒黃山谷所謂風力能冰酒霜
威欲拆綿元遺山所謂野狐嶺上一回首不信君心如
石頑復何償此區區乎蹉跎壯圖侵尋老境與其勞於
途曷若佚於家與其醴於彼曷若淡於此余固不足止
正卿之銳他日倦游歸卧於御河之灣息奔於丹陽之

祠追思疇昔當有感於斯言

易齋詩卷序

聖人之道載於經經之道原於易詩非易無以盡人情
書非易無以盡王事禮非易無以教民欽樂非易無以
教民和春秋非易無以教民名分易乃道之原五經道
之流也世之學者昧制作之本意指為聖人神天下之
書皆以茫然莫可得而詰遂晦其說於深遠之域不有
熟讀五經汭流以窮源孰知天地之道神明之德陰陽

之義性命之理盡在於是何以明之蓋明者窮象數者也故曰易者象也又曰極其數惟有象可以具八卦之體惟有數可以著八卦之用惟有八卦可以備六十四卦之變如月之在水雲之在空捨象數求易是無水而求月離空而求雲其可得乎平陽姚舜卿多讀書喜學易所得蓋不淺寓京師數年名卿賢士夫日至其門論說之餘往往扣以吉凶禍福輒取某卦某爻斷之應者嘗十八九人有酬之雖一毫不受非庸庸日者之可比

庶乎讀五經窮象數者也有易齋範泉巖右轄書其扁
諸公皆贈之詩既軸徵予序因原其易與舜卿所自得
者題其端或謂易之道深且遠矣豈象數所能盡其亦
未之思也幸無辨

雙松圖詩序

平定聶侯文綽甫由循州同知得代寓維揚出先師雙
松亭詩及其圖見示蓋無忘父風之意也且索予序余
謂古人愛松者多矣如藍田丞吟其間麻城令名其亭

天台道人寫其圖或見於韓記或見於蘇詩或見於陸
贄皆世所共知者昔乃父既詠而亭今嗣子又圖以形
是兼三家之美而為一門之榮宜乎有四方賢士夫之
為題評雖然松客也人主也松非人無以託其生人非
松無以致其清自先公謝世餘二十載其樹森然鬱鬱
鬱然尚賴後之主盟吾文綽甫方躋蹻仕途去鄉數千
里區區瘴煙中來每南北相望寧不各愴然其情以愚
觀之與其寫龍蛇之影孰若聽風雨之聲與其噫鸞鶴

之棲孰若踏雲月而行其或不諒斯語恐君他日夢有
挽衣者必蒼然之兩髯卿也

義商詩序

吾宗兄威卿自上江來會余廣陵云潭有許張二商合
錢作販鬻計凡五易歲無一字附記許因母喪遂罄所
有平分而去始終無少隙焉間歲復還潭時張方火其
廬生生之資盡絕許嗟嘆不已慨然以八百貫見惠既
受許徙居江州張復前業居無幾饒益又多取元惠之

數與所收之息併六千八百緡悉送還許許厲聲曰此
患難相助之禮奚其償乃堅拒之其子亦不敢違父命
若此者再月江州之親舊耆庶勸留半載而子始歸許
伺張生朝盡出所留易白金之器以為壽期於不負初
心而後已西南諸公皆美之以詩幸以黃絹幼婦之辭
題其端竊謂商乘時射利之人也至於超駟騶登龍斷
競錐刀逐羽毛生死於阜通懋易間日以致富為念初
不知救難周急為何事今許張二君能明交分立讓風

視數百萬如糞土與古之管鮑奚異故稱之以君書曰
義商噫彼列名公卿廁跡士夫有身繫衆鑰手執牙籌
雖銅山金穴垂老而未肯散一錢者聞二君之名覩二
君之事寧不愧汗如雨邪許平陽人字伯祥張真定人
字正卿皆忘其名竢他日得之而重書之

劉法師詩序

吾友馬君希驥晨持二詩軸為請曰此四方士夫贈相
下劉法師祈雨救病之所作也今應詔闕庭欲求臺閣

諸君盛製合而為一請吾子為序其大畧師蓋愿而信
直而義謙而不柔質而不蔽雖以道陵教受聖天子知
非上命有所祈禳未嘗一語自及每與吾輩游凡論好
善嫉惡之事則津津然喜見眉睫間較其云為寔道名
而儒行者也余曰嘻亦異哉世之拾殘經受祕錄者方
以術自居例謂儒者為不相干其視名章俊語為何物
獨劉君懇懇不已究其意豈特欲神其術異其事專尚
本家語耶若本家語是尚以之祈雨則不過如陸先生

之拂雲劉守真之嘆水以之救病則不過如葉法善之
攝魅江處士之制鬼斯皆師之飽聞而飫知之又何庸
復贅辭其旁是請也必有以見名教所以事君所以為
臣所以澤民者因言而願向之也吾儒誠能以是語師
師誠能以是聽吾儒當投龍降鶴之暇遇有顧問時以
清淨陳治道靈應贊化權其或進一大賢退一大不肖
是布天下之甘澤也是除天下之妖邪也不猶愈於向
所謂祈禳者遠矣昔魏鄭公侍中也初詭為道士尹偁

諫議也亦嘗為黃冠如希驥之談雖未敢必師以二公之跡至於求師以二公之心不無望焉余既義不得嘿因書師之固有以告吾輩作詩者其勿謾

魯叔寧古村易說序

國家數路取人陰陽卜筮無不與至則館集賢而廩給之比年雖雲合雨集求其術可以依稀髣髴者蓋少或依稀矣髣髴矣而不挾之釣功名干利祿者又加少惟有道君子厭奔競事恬退則異於是瀏陽魯叔寧專學

易尤精於數赴召闕庭有問輒驗嘗賜車以便出入詔以復徭役及欲與之官每謝不敢至元壬辰以老疾辭上意殊眷眷繼陳所以去之實乃許將登舟請余作古村易說序嘻世之取號于峯于溪于澗于松竹于梅菊不為不多斯屬閑適之趣果遂其所欲幾何人焉今叔寧發揮家學遭遇主知凡三寒暑無一豪物欲累如孤雲野鶴翛然而往回視以術取功名利祿之徒相去奚啻九萬里不幾於有道君子而遂所欲者乎自號古村疇曰

不宜且村埜也墅也墟落也復加之以古是世間紛華
事舉不足動吾意必欲耕寬閒適茫蕩鄰寂寞致蕭爽
慕龐德公鄭子真之為人想焚香默坐手執周易一卷
時客有自京師而南訪於青楓之下飯飽茶餘談某之
拜免某之成敗某之吉凶固皆在君術中亦未必不對
客笑且嘆也余因其歸為之歌曰澤之邑有曰瀏陽魯
之居居邑之傍維今瀏陽兮乃古臨湘風物瀟洒兮民
俗富穰田有米兮玉粒長爰有酒兮浮蛆香人生所貴

兮壽康古村之樂兮樂未央片帆歸兮渺相望盍一語
兮決余之行藏何時杖屨兮如君徜徉


朱孝童詩序

事親莫大於盡孝孝以養疾為大養疾莫難於童幼幼
以有感為難故滕曇恭五歲遇寒瓜以療母患梁彥先
七歲得紫石英而治父疾皆筆之史傳垂之後世貴其
幼如此其孝孝如此其有感也至元庚午清苑朱元僧
年十三以父病篤百療不能愈輒默剗其股之肉既烹

且給父況水以進父隨飲而隨起較其物與所謂瓜石者固異至其所感者一也後九年建康按察僉事王君晉卿請余為序其事余曰嘻亦異哉自唐著本草拾遺謂人肉治羸疾有以剔股旌其門昌黎公嘗論之曰父母疾烹藥餌為孝未聞毀肢體者也及宋講求貢舉東坡亦議之曰上以孝取人則勇者割股怯者廬墓是教天下相率而為偽也蓋二公皆不與者惡毀傷以求旌表之名懼詐偽以取僥倖之榮也今朱氏子昏昏一童

駭耳當天理發見時萬慮俱空惟一真實在操刀之頃
曾何有表名之望動其機耶亦何有倖榮之念橫於心
耶以余觀之生窮鄉委巷無教養之資遽忘身及親若
此雖非正道亦有足稱者使得見二公未必不畧跡取
心舍常從變復以孝童目之也聞是子頗好學果前念
不汨後志愈篤不自足於一行復多讀於羣書能仁此
孝義此孝禮信此孝敬視如對日星敬聽如對雷霆則
他日肅然所通無門無旁塞乎天地橫乎四海又何煩

余喙之喋喋焉阿僧其勉旃



欽定四庫全書

集部

西巖集卷十四至
六

詳校官中書_臣李彤

侍讀_臣孫球覆勘

謄錄監生_臣沈齊

謄錄貢生_臣張大同

謄錄舉人_臣范翔集

欽定四庫全書

西巖集卷十四

元 張之翰 撰

序

王晉卿母呂氏慶八秩詩序

至元己卯江東按察僉事王君晉卿授命之再月持太夫人八秩詩軸屬某為序切嘗論之人事父母孰不欲壽其親亦孰不欲有所聞於人至其父平昔無大過人者尚多泯泯焉矧親之母氏乎矧母之壽章乎不有

孝敬淳儉之素德慈愛賢明之實行何以見稱於當世也如太夫人呂氏本陳之大族幼歸臨漳王公奉舅姑無違禮及養後姑尤謹餘四十年雖鄰里莫知王公之有繼母也其事公能執婦道公亦待之如賓致閨門肅雍然茲非孝敬之驗歟壬辰河南破人皆北渡家以二車載貧病不能全活者至徒行數百里既還相時賢雄城市略不着紉綺唯布素保家是務茲非淳儉之徵歟初王公有側室夫人遇以女弟視男女猶已出僕媵有

過溫諭薄責而已未嘗出一言聲故中外無怨言茲非
慈愛之著歟晉卿生貿易間自總角令讀書人多勸作
治生計夫人竟不聽益勵以學每師友至必喜見顏色
及有周急濟困之事嘗傾困倒廩無毫髮吝使今日為
名士歷顯宦然由義方中來斷織之力居多茲非賢明
之效歟以是行是壽而有是賀者宜矣彼憊惡不悛驕
悍自若賊其子奴其夫寇讎其舅姑便令得數十甲子
聆夫人之聲頌夫人之德將愧汗雨集之不暇尚何望

壽章成軸者哉晉卿今行矣聞肩輿將隨之官以不肖
區區之情固恨無才請連州之近治尚祈有喜笑京兆
之平反是禊立秋日序

中聖亭詩序

至元庚辰余被擢入郢過張君德修都事之東墅方輦
石擔土基乾之隅余未詰君君乃語余曰此吾築亭之
所亭雖未成已取徐邈酒清為聖時復中之之義以中
聖名之將徵詩作軸請吾子為序余曰嘻大哉聖乎凡

游聖門躋聖域履聖途有土曠然無險阻之難有氣熙
然無寒暑之虞有俗寂然無利害之擾有風恬然無愛
憎之殊其行徐徐其寢愉愉真民之無懷國之華胥也
故素盞取是道以脫身陳平用是道以保家曹參由是
道以安天下後有頌其德贊其功記其鄉君今又欲序
其亭非游之久濟之深履之遠者能至此歟雖然如吾
德修志高行潔才博氣猛由行臺之佐與平宋之功一
有齟齬遽邈之慕惟聖之娛以余觀之今四海為家蔑

三分之曹魏羣賢在位豈一語之鮮通但恐君之名一日達上聽上之命一日及君居不特領安南守賜關內侯遷撫軍將軍而已乎彼或笑沉湎譏狂愚謂濡首腐脇是圖斯皆吾聖之罪人又豈真知君之徒抑未知作詩者以為何如君舉觴起謝曰子得之矣子得之矣邯鄲張某敬書

霍御史母氏八秩詩序

凡為人子莫不欲親得其壽為人親亦莫不欲子榮其

壽故世有七十古稀之語又有八十辰慶之禮雖然使其親壽所謂子者窮且苦方菽水不給當介眉之際徒有仰視鶴髮長太息而已奚以慶為必得其子光輝騰達為時所稱其於曳朱紫之餘斑舞乎目前以盡捧觴之樂然後可以為榮矣是知得壽者為難榮壽者尤為難今國瑞御史聖善已登八秩之年尚耳聰目明優游几杖可謂得其壽者矣而御史幼服三遷之教能以儒節吏翔歷省臺可謂榮其壽者矣至元戊寅春與余同

事川蜀將求四方賢士夫之詩以賀乃囑余為引余因告之曰聖善所以壽者天也御史所以榮其壽也亦天也以是壽有是榮意天之所以福君者尚不特在今日恐有後日遠大之界也君誠能知天界之意日孝日敬疊種厥德則將見聖善之年益高御史之名益重使後之賀者視今之例當有大書特書幾卷幾軸者出余雖不才政以此為張本云是春燈節前三日邯鄲張某序

時賢詞翰集序

余掾憲臺被檄按川陝嘗會宋鑑山先生於長安時先生集四方交游雅製成十巨軸以甲乙第之至一百九十餘人目曰時賢詞翰續有所得擬作別軸一別十四載杳不知其何如今年秋其子禮聽彥聰錄為數帖使老僕負之訪余京師始知先生已去世二年矣言念舊游不覺哀嘆既而彥聰堅懇曰先人平昔志在是書凡交游既歿者皆立小傳著出處之大槩當時方興耒耜者特書其姓字爵里耳書未行遽棄養而去不孝某分

為前後二集將鈔木以傳立傳者列之于前書姓字爵里者列之於後也獻陵劉元質雲中孟駕之二公之引皆冠前帙敢以後集序為請余謂士之德莫貴于揚善亦莫貴于伏善蓋揚善者難而伏善者又難也觀詩丈樂府不啻千餘首始于父執之四賢非揚善而何終于時輩之諸公非伏善而何昔揚雄深于玄者也劉子駿僅讀一過便有覆瓿之語何遜清於詩者也劉孝綽止取兩篇遂有撰詩苑之譏玄果泯乎詩果不傳乎在

揚何亦奚損適足以見當時忌嫉太甚二劉尚若此況
其下者乎今羣賢雄章傑句如精金美玉自有定價光
焰固不可掩使選集時果無定見一為俗議所搖亦未
必成此美事其用心賢于二劉遠矣至于孰詩之雅正
孰文之高古孰樂府之清新覽者當自知又何待余喙
喋喋也唯集中鄙詩數篇為我刪之先生諱某字某官
中順大夫西蜀四川道提刑按察副使鑑山其自號云

送王君朋益燕南憲司序

自余任南臺御史中間走七閩歷兩浙未嘗少安於此
雖同列人十餘有不及接一語共一事者二載之間轉
遷殆盡吾友王君朋益相遇最晚其臨事應物處相益
最多蓋余之方賴君而圓余之固賴君而權余之拙疎
賴君而周旋纔一換歲又改燕南僉事則余所病方固
拙疎將在乎膏肓雲山悠悠一別千里秋風馬鳴到官
在邇正諸君喜得同僚之日是不肖恨失良同志之時
也故序而復詩至元癸未重陽日邯鄲張某書

張澹然先生文集序

士辰汴梁破前進士不歿於兵不孥於野不殞於溝壑者固少而平達河朔名動當世變舉業為文章者又少由元季而下如王鹿庵徐復齋諸公僅十餘人濟陽張澹然先生其一也先生弱冠有雋聲登正大八年詞賦第雖歷省掾授郡倅百蘊不一施罹大變而北歸清河之濱筆硯自隨刻意讀書大放厥辭東行臺敬其賢復署以郎位非素志也年踰知命竟澹泊以終有詩文樂

府數百篇子維仲安任國子博士集為若干卷請序某
伏讀再四愛其篇目少而體制備蓋詩寓去國之情而
不露其悲傷文盡叙事之實而不失於冗長樂府達處
順之理而不流於浮艷謔浪非天資高學力篤道味深
世故熟其孰能到槩而言之真前輩中大手筆也惜乎
天不假年不得與同輩諸公頡頏於金馬玉堂之上盡
展其所長妄論若此使今日尚無恙抑未知以為何如
某少從敬齋學公於先生為同年見所作張氏世德碑

極稱其才又嘗與仲安同掾憲臺故不辭而書仍併及
出處之大畧云先生諱鼎字輔之澹然其自號也至元
辛卯六月初吉邯鄲張某序

送翰林學士閻公浙西道廉訪使序

更化後制度一新尤注意風憲改提刑按察為肅政廉
訪使責任愈重選人益精否者汰而能者舉靜齋閻公
以翰林學士除浙西道廉訪使命既下每以任重辭某
義在同僚敢告之曰自漢唐治天下莫不以遣使為急

曰循行曰直指曰採訪曰黜陟與今所謂按察廉訪其名雖殊其實則一率不過美風俗勵政治禁貪猾舉寃滯保疲瘵登俊又以公之學素所習知以公之才皆所優為果南北諸道人皆如斯何憂乎不治竊嘗思公由東平入燕處深嚴十餘載一旦渡長淮越大江過浙閩諸名山如堯承旨詩所云平生夢寐不到處乃以王事從私游肅清之暇伸紙落筆發揮胸中所有亦南游之奇絕也第恐朝廷早晚有大顧問大謀議視吾輩中不

見公之風采未必不走驛騎而趣歸後之寵拜豈淺淺可知是行也又奚辭諸公盍餞之以詩至元辛卯夏六月望日邯鄲張某序

送行省員外郎趙君伯恭赴汴序

事親孝為大孝祿養為大所貴乎祿養逮其存而有以榮之如子路不擇祿而仕毛義捧檄而喜姜公輔兼京兆戶曹許康佐求知院官皆此意也泰安趙君伯恭性至孝善奉母承顏旨酒介眉求詩嘗見稱於搢紳諸公

在京師幾寒暑每瞻白雲輒作悵惋至元壬辰由中書
右司都事出為河南省員外郎僕馬在道過余言別津
津然喜見眉宇間蓋便養之志得矣當三山雨晴故宮
花香御板輿稱壽觴絲竹駢列歌舞揄揚柔色慈顏而
並悅彩衣朝服以爭光使汴人豔其榮是春風宴席之
初張也至於佐外省撫諸郡決袞袞之簿書吐婉婉之
幕畫在伯恭餘事耳故不書是年正月二十二日邯鄲
張某題其端

古今指掌圖序

天地開闢未有疆理神農之王天下東西九十萬里南
北八十五萬里黃帝經制萬國堯遭洪水命禹治之別
四海為九州舜釐為十二夏禹塗山之會執玉帛者萬
國商湯革命吞滅過半周之封建不過千八百國吞滅
又幾半矣春秋止百七十國戰國止七國秦始皇兼并
四海分四十郡漢武開廣三邊後置十三部光武併省
郡縣其後亦為十三州部自是分為三國至晉而混一

裂為南北至隋而混一唐太宗分十道玄宗分十五道
昭哀之亡五季擾攘至宋而混一建炎渡江遼滅金強
至國朝而混一嗚呼由五三而下有疆理者凡幾變更
幾分爭幾混同矣此閩士陳某光大古今指掌圖不得
不作也纂圖四上下貫穿三千八百餘年國之所以久
近所以興廢披圖一覽盡在目前名為指掌孰曰不可
余非善談史者因請序竊有問焉觀君次歷代之事掇
精英而入簡約是祖司馬溫公舉要歷之遺意也存三

國之正統屈曹魏而進劉蜀是準朱文公綱目之書法也舉要固大體綱目亦正論但紀國編年之際必取綱目例吾恐光大之筆尚有吮之而未易下者光大曰敬聞命矣至元甲午四月日前翰林侍講學士邯鄲張某書

秋聲集序

始余為行臺御史道松江會九山衛公泊其子謙纔一杯而別後十年來牧是郡訪九山墓宿草已六白矣謙

出公秋聲集求序許而未作又旬歲屬者暇愈少請愈力因思古今騷人多寓意秋聲中由宋玉九辨而下如李太白有紫極宮何處聞秋聲詩劉禹錫歐陽永叔有秋聲賦率皆悲時之易失嗟老之將至狀其淒清蕭瑟而已今九山之集取名雖同而實又有所不同者昔在淳祐間公起喬木世臣後班省闥鎮藩輔無施不可此時不獨無此作亦未嘗有此聲也及時移物換以故侯退處于家不求聞達舍大篇短章何以自遣盖心非言

不宣言非聲不傳是知聲之秋即心之秋即江山之秋
江山之秋即天地之秋也聲無窮秋亦無窮彼觀是集
讀是序見山谷所云末世詩似候蟲聲便為誠然正所
謂癡人前不得說夢豈真知公者乎九原有靈或聞斯
言公諱宗武字淇父官至朝請大夫九山其自號云至
元甲午重九日序

送王侍御河北按察使序

有地數千里有城數百區持肅清之權按治於其間喜

之而為春怒之而為秋使百辟羣吏趨走聽命之不暇
大丈夫得官憲司亦榮矣矧自內而長者乎矧得歸其
鄉者乎至元十四年春通議王公以御史出為河北河
南道提刑按察使使長者也相舊居也奉命之日喜於
治裝了不見其留連戀顧之意其為榮也又明矣聞者
猶齎咨怪疑咸以為不當去方朝廷不次用人如公之
寬而明廉而溫不苛細以害事不矯飾以沽名德如此
其厚學如此其優不橫飛直上而區區再授是職何甘

于外除樂其南歸也蓋不知公之所以蔚豹變之丈際
龍飛之運一命而春官再命而虎符三命而烏臺英聲
華聞垂二十年果輕舉易動乘時取位安往而不到第
顧其道之與義職之與志如何耳苟道行義合職修志
得豈有乘使者之車還舊居之地不以為榮乎如其不
然雖內遷上擢不過占位謹署苟延歲月而已是豈公
之本心哉是行也謝倥偬絕危疑就安崇達坦夷必將
見鏗錡其政聲煒燁其德望凜秋霜於劾奏之餘沛時

雨於平反之際使循行不獨美於漢黜陟不獨稱於唐
一旦聖天子圖任舊人馳驛騎於鄴南走星輅於洹上
召公共大政決大議上沙隄而轉黃閣秉鈞軸而調鼎
鼐不猶愈於向所謂輕舉易動乘時取位之為遠乎若
夫衣繡而臨西溪水波為之增明攬轡而望西山雲煙
為之動色騶唱導前騎從擁後夾道之人觀者如堵見
輝煌焜耀未必不與韓氏畫錦齊稱而並道由是觀之
則公之榮非特在今日又當為後賀用是敢泄疑者之

情及公之所可必者為之序

梁塵外山中吟序

近世緇黃之詩緇固少而黃又絕少間有留心筆硯寄興篇什能不淪於頌語不流於教言可以傳播搢紳士夫之間千萬中纔一二人何作者之寥寥也道士梁塵外中砥余舊識於茅山多作詩樂與吾輩游嘗贈余古律數篇使人讀之不置蓋一二人之傑出者近攜山中吟藁來京師觀者無不稱嘆復請序於余且求正焉所

貴乎道人之詩塵俗固不可專用道家語亦不可然則
何所依歸乎羅浮道士誰同流草衣木食輕王侯世間
甲子管不得壺內乾坤別有秋數著殘碁江月曉一聲
長嘯海山秋飲餘回首話歸路遙指白雲天盡頭此非
有唐呂洞賓之詩乎詩之奪胎換骨超凡入聖無出於
此歸而求之有餘師以塵內之吾觀塵外之渠向上一
路悟則即到竢他日再游華陽洞天相訪於積金峯之
巔煮石乳酌丹泉焚古龍涎盡讀囊中別後之篇必有

合於二仙余試指似之當笑領焉

葵軒小藁序

金百餘年士大夫例熟科舉業求以詩文鳴世者由黨
趙以降纔數屈指而已蓋皆舍緩而趨急得此而失彼
不有豪邁特達者出而造物界以才氣付以師友假以
歲年其何能兼之哉葵軒先生張公金遺老也自妙齡
已有聲場屋戊戌再以詞賦魁山東其篇什文字尤刻
意不廢非才氣之偏乎在廬臺則從學師右轄仲安過

河南則接見禮部閑閑公北渡後則交游王鹿庵楊素庵諸君非師友之賢乎建元以來同輩者登臚仕據要津不旋踵而凋喪殆盡獨恬守一教官竟得安閑晚境今壽近八秩尚以著述為事非歲年之延乎有集若干卷號葵軒小葉其子克勤等求余為序余謂先生稟賦若此淵源若此老於筆硯又若此可謂兼而兩得者也至於詩之清適文之典雅已傳布人口讀者所共知又何待余言之重輕而區區為是者特以科場人視詩文

為末事不能兼之者存所警云

送鮮于都事赴任杭州序

朝廷更化急於用人吾友鮮于君伯機由湖南憲幕召補內省掾以家貧親老不能北順流而下留寓淮海讀書攷古外百不事事行臺便其養嘗兩薦為監察御史意其命可立待未幾改授浙西宣慰都事君固處之自若識者皆有位不究才之嘆余竊謂不然蓋天之生才必有用至於用違其宜處非其地在乎遇不遇合不合

爾彼深情厚貌內姦外朴君肯表表以為端誠乎彼布被脫粟欺世盜名君肯矯矯以為淳儉乎彼害功生事多忌好訐君肯皦皦以為公平之與剛直乎君雖不吾語吾知君弗為且御史黃牒也都司亦黃牒也御史緋衣也都司亦緋衣也初何有貴賤高下之間如伯機之才之學坐之繁劇紛擾之中而不亂置之羽檄奔走之地而不惑能言聽計行職修志得與其羣列於此孰若獨立於其彼與其倥偬於內孰若從容於其外況齒髮

日脫名聲日白雖欲委順不苟於世安知將來不有大
遇合者孤舟水生亟趨杭矣暇時一過湖上為我謝南
北諸峯方自剋求去慎勿使白雲扃巖青松遮道以我
為山中之逋客也

送高搏霄序

搏霄與余游餘二十年余見同進者或緋衣或朱輪或
金虎符方相望于時獨君一墮篋庫數載始得歸何遇
不過遼窻之若此然君子不患位卑患志不立不患祿

微患學不修以君之志之學能立且修後必有大合者
又何用幽憂其心憔悴其色耶是日酒半酣出齊州門
驅羸馬而西歸到吾鄉為寄聲西山白雲雖簿書倥傯
而此心無日不思諸公矣

欽定四庫全書

西巖集卷十五

元 張之翰 撰

記

鎮南樓記

鎮南樓在興元公廨之左某至元丁丑冬奉命入蜀取道漢中見吾總管安侯於其上得盤桓周覽以盡其勝越二日將行侯命記其樓居之所以蓋構之之始構之之由皆弗知也唯命名之義有以見張魯嘗拜鎮南將

軍於此年禩悠遠亦不可必姑即其所名之意而臆說之夫漢中道褒斜之險阻巴蜀之隘接秦隴之雄豁然在一川中實西南之要衝也而鎮南俯漢江之皋顧中梁之雄揖米倉之開翼然在半天上亦西南之傑觀也以是郡是樓而取是名固宜雖然果高牙大纛騶道騎擁得出入乎郡之樓者幾何人焉而重簾複幕裊卧鼎食不媿負乎樓之名者又幾何人焉今侯以通敏之才兼文武之學由陝西憲司得總是郡既居其樓復求其

記庶不負其名者信矣由是觀之則侯之閱圖籍鈎帳符是欲復流逋之戶民也問阡陌別水陸是欲闢將蕪之田疇也聚經史召生徒是欲興已廢之學校也集條章考案具是欲平久淹之囚獄也嚴弓兵明鼓角是欲警未發之賊盜也隘關嶺謹棧閣是欲警不諛之寨柵也將見朝廷無南顧之憂兵民有北歸之樂如黃潁川之政治廉叔度之歌謠趙廣漢之威名皆自此樓出是時不惟覩鎮南之效大白於世當望鎮南之書輝輝煌

煌在參井間若聯星然使人愈久愈敬又豈特不負其名而已哉若夫據高明謝卑濕迎清風送白日與二三僚屬會於斯樂於斯貯歌舞於斯恐非居樓之意也故畧而不書侯滏陽人祐其名吉甫其字云是冬十二月望日忝鄉梓張某記

舒嘯亭記

距鄆東南二十里而近有曰梁村武城尹張君和卿之別墅也至元乙亥其子士觀幼度洎其壻胡世良寧弱

嘗讀書作詩於此愛其風物瀟灑有足致其樂者乃為
君築故隄而亭之既亭之共乞名於翰林野齋李公公
取舒嘯以名之既名之亭弼又請余記之蓋其地前瞰
汶川後倚金螺諸峯且緣以花卉帶以竹樹方春夏之
交烟霏空翠林光野色間見層出相為蔽虧宛若圖畫
然餘皆不能盡其勝獨是亭翬飛高明裛數十里造化
之功叢輸於几席之上以供朝夕之娛亦臨眺之佳處
也而野齋不取諸水不取諸山不取諸花卉竹樹特摘

淵明歸去來辭登東皋以舒嘯二字名之者意豈特學
蘇門之遺聲繼陳留之妙響激清於舌端發吹於口吻
而已哉亦庶乎有所慕效而然也嗚呼淵明之出處在
晉一人而已歸來之文章在晉一篇而已今張君雖纘
襲世祿為縣有聲果能尚名而務實誦文以求理則他
日厭形役念田園謝折腰之辱審容膝之安日與賢子
壻共登茲亭每徘徊周覽汶水潺湲則賦詩之清流也
螺峰崔嵬則悠然之南山也花竹參差則猶存之松菊

也儻白衣送酒至引觴自酌餘亦當向京華塵土中西
望作記之人也張氏父子余雖未之識觀亭弼之文雅
定知其不凡故敢併為之書十六年己卯夏四月初吉
邯鄲張某記

平野亭記

郡治東可百舉武因城以為臺因臺以為亭初不知構
之何時揭之何名至元辛巳余自海上道密宮行深山
大林數百里以達是境平田沃壤四顧豁然甚快人意

越翌日郡僚導余至亭上詢其地曰故基郡侯老撤去
歲始重修視其榜曰平野前守諸企范今年之重書也
酒再行諸君問名之所以余謂沂郡春秋時齊魯之地
戰國時屬齊楚魏置北徐州蓋前人取杜詩平野入青
徐語耳雖然方國朝甫定城與淮海敵四郊多壘烽燧
不息昔之平野也及燼宋既平地與南北通黎民復業
烟火相接今之平野豈昔之平野耶諸君常公退之暇
與二三僚屬憑欄縱目望蒙山則見老萊之舊居可不

思化民之教乎望顏墓則弔真卿之英魂可不思守郡
之忠乎望武城則知子游之故治可不思為政之絃歌
乎否則雖稻麥如浪禾稼如雲適足以為宴游之遠景
觴詠之美談恐非命名之義諸君起謝曰既聞是說願
刻石以識余拒之曰郡靜治堂有鄭子晦記香林館有
王子端記雨聲軒有劉象先記顧鄙文鈍筆何敢為諸
老繼凡拒愈堅而請愈力是年夏六月晦日故書以為
茲亭記

樂春園記

濟南泉石間池臺亭館固不少其成趣者惟南城高氏園而已至元辛巳主人高通從吾總判趙君克明求余名與記余嘗至其處見四時花卉皆備而又穠且美因詢所以然主人曰生平所好莫過於花通之治花能順其天得其性不害其長故蕃茂若此蓋今之芳叢花簇皆昔之荒榛老蔓也今之平欄曲檻皆昔之頽垣斷塹也今之光風麗日皆昔之陰霾晦雨之與野燐也余聞

是說乃以樂春名之主人疑其名既云花卉皆備奚獨
樂春從而語之曰所謂樂春者豈一時之春乃四時之
春也韋紅鮑黃固春之春池蓮錦明非夏之春庭菊金
爛非秋之春簷梅玉暎非冬之春乎此立名之大槩也
若夫世之遊觀者入子園達子道果移之治心則心之
樂春移之治身則身之樂春移之治郡邑則郡邑之樂
春移之治天下國家則天下國家之樂春由是觀之其樂
可勝言哉余聞治花得治人術故書以應其請彼或騁

心縱懷宴飲無度沈於斯酒於斯日聚蚊於斯雖曰樂
春終非余之所謂樂春也是年中秋日記

崇安縣重修縣學記

學明人倫也人倫不廢學可廢乎故大而京師小而郡
邑通得祀先聖先師於學中間因盛衰相尋廢興不常
未有中泯而無復者蓋關乎天地繫乎氣數本乎風化
然也崇安舊有學當天戈南下燼宋將滅為羣不逞撤
毀殆盡至元己卯張君茂來為邑令政知後先首建禮

殿修講堂前以三門旁以兩廡至於先賢之祠宇諸生之齋舍固不具舉起庚辰冬仲成辛巳秋季宏麗邃深幾亞郡學後一年某取道是邑邑士趙若等狀始末求記愚謂自王道衰有縱橫有楊墨有申韓有黃老有羣儒之專門有科目之時文降及近世又有弊於傳解自我作古蠱惑世人死而弗悟皆不得一意於有用之學嗚呼六經所以載道也道常著於六經未作之前諸儒所以明經也經當求於諸儒無說之際要先正其心修

其身齊其家然後發為文辭措諸事業教人為良師臨民為循吏事君為賢臣又豈特專事虛文空言誇多鬪靡而已今國家混一惟聖道是明聖學是尚無舉業之累絕利祿之念正學者為己之時果能不為淫辭詖行之所汨狹聞褊見之所溺雖溫嶺去聖門數千里安知他日不有舍近而遠由南而北游杏壇詠舞雩徜徉乎洙泗之上者乎今本東魯人盍以是語之若夫溪山之勝棟宇之備竹石木瓦之費學有能文者自紀於碑陰

茲畧而不書是年十月日記

義方齋記

戶部郎中閻君庭晦為人樂施賓客填門有書萬餘卷
葺齋所居西偏取馮中令贈竇禹鈞之詩名曰義方請
記於余因為之說人之有子知所以愛鮮知所以教知
所以教鮮知所以義今閻君以是名名是齋必當慕竇
氏之有義乎慕竇氏之有義即當知左傳愛子教以義
方弗納於邪乎知弗納於邪抑當求大易所謂義以方

外者乎蓋義者根一心之真制衆理之用者也仁非此無以為仁德非此無以為德道非此無以為道禮非此無以為禮庭晦誠能勵諸子學擇師之良取友之益矯揉其心志調伏其血氣讀先聖之遺言必探其精微究前世之懿範必極其終始不信不果惟義所在無適無莫唯義與比若是則天下事雖遠近大小之不齊輕重隆殺之或間森列吾前固萬殊不同凡泛應各得其所當者是理也曲酬各適其宜者亦是理也吾將見理與

心融心與理一不求名而名自隨不干祿而祿自至況
昔之燕今之燕為地不異實之居閭之居相去無幾安
知他日不有由此登翰林為禮部在起居歷諫議參政
事者出焉故書以應其請又從而告之曰閭氏諸子詵
詵正立時再思十思汝父所以名齋之意其無媿

超然堂記

河東宣慰使安公祐由鄉來京師致天慶道士栗從悟
意亡金老宿威儀薛公諱正圓與趙禮部閑閑有夙好

貞祐南渡坐逝于汴舉體柔煥如生人以為僊閑閑祭以文書超然堂三大字付其徒聶忠謹近歲祠二賢於觀仍以所藏三字扁其室懇余記將刻之石余謂磁之觀以天慶跡城郭趣山林為重觀之石以閑閑銘玉虛祭威儀文為尤重曩余每一至未始不誦石刻於荒烟寒露中摩挲久之而後去今從悟用心若是可謂善繼薛而深尊趙者也故喜為之說超然不見他書惟老子云雖有榮觀燕處超然想閑閑下筆時固因超升而書

其意蓋本諸此昔坡仙自杭移密無以自放葺廢城為
超然臺坡有記潁濱諸名公有賦非世之達者烏足當
之觀閑閑大書之旨即二蘇諸賢述作之意觀威儀蛻
去之事即老子逍遙自得之驗也余方奔走於是非之
場浮沉於榮辱之海雖未能屏物累絕世慮爛讀五千
文至如餐沆瀣而服芳芬凌倒景而乘飛雲朝玄圃兮
夕崑崙訪丹丘兮揖羨門此亦余之素志將問津於堂
之主人從悟師忠謹嘗為本郡道官道業精修鄉里稱

善能成此盛事亦尚書公及其弟四川按察副使祐贊助之力也至元辛卯長日記

樂善堂記

人之心未始不善一為物欲所蔽則善與否分焉唯賢者終其身不厭葢知之而能好之好之而能樂之故也雲中李彥實資孝悌崇仁義為人謀必忠與人交必信自妙齡力學年踰知命不求聞達聚書數千卷日以修身齊家為事雪庵大宗師光公嘉其賢名所居堂曰樂

善既為之書請余記余因告之樂善之說有二有樂人之善有樂己之善如書人之有技若己有之詩愛莫助之禮美人之功語君子成人之美皆樂人之善如孟子仁義忠信樂善不倦乃樂己之善也聞彥實孜孜焉汲汲焉務其德不務其祿即修其天爵而人爵從之之意其庶乎物無所蔽樂之終身而不厭者樂之說雖二而其理則一未有不樂己之善而樂人之善也方國家訪遺逸求隱淪若彥實者旦晚當有旌車之招果得時行

道大展所蘊則田文之愛士鄭莊之好賢何武之獎人
又有望於將來可不勉旃彥實名蕢故行六部尚書諱
某之第三子其家世事業見於內翰李韋軒先生所作
神道碑茲不復云至元辛卯日南至後三日邯鄲張某
記

愛菊堂記

人皆植花而植菊者嘗少蓋花穠菊淡穠易親淡易疎
故爾陶靖節以下不有取其操與其德其能愛之終身

傳子若孫而未已者乎江浙簽省嘉議郭公自大父棄
官汴梁流寓於邳築清夷道觀有堂曰愛菊及父倅覃
懷嘉議宦餘杭構堂種菊皆扁前名可謂終其身及其子
孫世濟其美也至元壬辰余由翰林知松江嘉議走書
三百里請為愛菊堂記夫菊之為花堅正高潔不爭妍
於紅紫低昂之時乃發秀於風霜搖落之際或比君子
或比端士宜郭氏三世愛之若此余生晚不及拜嘉議
父祖嘉議出處畧能言之昔在樞幕同列有超公數等

者人嘗為公鬱獨處之恬然亡幾何超等者淪落已盡
公方擢憲使簽外省年近古稀精力不少哀使中外稱
善則菊不負人人不負菊明矣今政化更新人惟求舊
如韓魏公以晚節自況尚有望於將來也適坐堂憑案
伍鴈鷺行偶作數百語雖簿書填委便覺幽香到人懷
袖中亦可為之一快是年嘉平月既望邯鄲張某記

欽定四庫全書

西巖集卷十六

元 張之翰 撰

記

浙西鹽倉記

自煮海鬻筴鹽利不容廢置場籍戶鹽禁不容弛蓋有
產則有積有入則有出亦變通之權便益之法也故倉
不得不設松江古華亭邑枕江負海厥土廣瀉牢盆之
贏實百他郡後升爲府仍司浙西鹹鹺併浙江東錢清

西興及江北六場隸焉舊有倉歸附以來廢為瓦礫昭
信校爲浙西鹽使阿薩爾前任松江判官有明敏稱閭十
年來蒞是司至之日首以倉爲急務乃率僚吏即故基
峙屋八十一楹既成求余記余謂修廊縵迴簷角翔舞
重櫺傑棟屬連演迤此倉之興造也漉沙結白熬波出
素冰裂電碎眩轉的皪此倉之儲蓄也風帆海船隨潮
下上富商巨賈雲合雨集此倉之發運也此固爲美猶
恐未之盡領斯倉者或邪溝暗港私販旁午私日多而

官日少可不思所屏息乎或倉吏網兵姦利相市混晶
英而雜偽惡可不思所核視乎或上虧國用下闕民食
利未興而害未除可不思所建白乎昔杜中立為義武
節度使歲輓鹽海濱人甚苦之置數百人具舟以載民
不勞而軍食足當時號為飛雪將劉忠肅責監衡州鹽
倉人皆食善鹽且儲其美以為償弊減十七八父老目
為學士鹽今昭信建立若此則中立之才可見矣至於
處監當之職任均輸之責如忠肅者尤當選其人昭信

生西域久仕華夏趣向甚可嘉敢併書以告至元癸巳
四月某日

風涇驛記

環雲間皆水唯西南塘路可通郡故郡以風涇為喉襟
蓋出入無不由此至元癸巳南省許置驛視公帑一錢
莫敢動有鄉之好事者張某及近堡數巨室來助木瓦
之費余與同僚度其地令端官陳青創屋十二間雖未
盡輪奐之美館之所湏亦畧備古者國野之道十里曰

廬三十里曰路室五十里曰候館有飲食有委積皆所以待朝聘之官也今也吏驛者賓至旁午固宜奉符閱數執牘書物展蠲潔之敬致供饋之禮勞迎餞別俾盡歡而去過是驛者朝憇夕庇其可折蒿斷牽破舡碎鷁污敗其室廬廢毀其器用畧不顧惜乎起四月某日畢七月某日至於規模日宏締構日增擅浙右傳舍之稱又當俟後來諸君姑勒石以告厥成

松江府廨記

松江古華亭民物繁夥爲天下壯哉縣天兵渡江至元辛卯直隸省郡號雖新縣治仍舊加以上雨旁風日摧月毀愈見其卑隘之不稱也越明年某由翰林牧是郡與達魯噶齊瑪哈穆特廣威同知王渠實喇布哈奉訓府判趙德行承務一意催科奚暇他及又二年偕廣威赴省陳弊病之尤者除荒租等額十餘萬府中漸廓廓然於是同僚叶議今民命脉稍甦瓜期將近解之不修復何待迺就木瓦竹石之所有補短以長代朽以堅易缺以

完物則平買出俸金以酬直遠近聞者無不喜至有一
二貴室願爲之助或以梁或以米或以工役之費上不
侵於官下不及於民始甲午仲冬迄乙未春季四晦朔
而厥功成崇數尺之基敞五間而耳以左右屋者廳事
也拓數丈之地合兩廡而翼以東西樓者吏舍也而又
署參佐於乾設架閣於英嚴狴犴於坤遠庖廚於震其
規模纔十七八翬飛翔舞已與雄藩巨鎮相頡頏以今
視昔如隔仙凡每庭空吏散倚危欄送落日顧瞻徘徊

覺三泖之增明九峰之益峻水吾硯池山吾筆鋒發清
思祛簿書之昏揮新句解鞭笞之勞呼皮陸於蒼煙翠
靄中間當時唱酬處亦可為公餘之一樂闔郡交賀後
廣威舉酒屬某記昔叔孫所館一日必葦陸抗臨去繕
完城圃我輩固不敢望其于視公府如傳舍畧不加省
而去庶無媿故書其詳以告來哲

普照寺藏殿記

佛之跡不可得而見所留者言佛之言不可得而聞所

存者經自西方教入中國有曰十二部有曰六百五十
七部又有曰五千四百八十卷蓋如來四十九年之所
說諸菩薩大弟子所記西天二十八祖此土六祖之所
傳與古今高僧賢達之所著舉而集之愈久愈夥非俱
舍何以置梵云俱舍此言藏至傳大士作天地輪以盛
經典令諸有情推轉乃謂之輪藏藏之不可廢也以此
松江普照寺據通闡俯連漪為郡剎冠淳祐間燬于火
若厨若廊若大殿由宋季及元皆次第崇修稍還舊觀

惟藏院一瓦礫場耳梵修主僧希白居剎之四年慨然有興復志會郡富室王提管國英慕善樂施以力倡率及大檀那來助始至元十九年之三月迄三十一年之十一月越十有三載而藏殿成共費一十五萬殿二十楹藏崇五丈廣半之金碧照爛髹漆精明上有飛僊橋中有棲經函旁有鐵圍山下有香水海每巨植碑轟人運機而神効力如車之旋如風之行如雷霆之驚壯麗傑特雖百歲老人猶以爲希有明年希白狀始末求余

文余曰初經之未廣也或以銀或以金或以血寫者當
多及經之既廣也印於福印於杭印於蘇讀者益少今
五千四百八十卷貯以五百四十八函以五百四十八
函而總為一藏以一藏而載之以輪是豈徒張皇詭異
為一方之誇耶抑將見學者朝講夕誦內有所自得耶
昔德山周禪師精究律藏嘗講金剛般若時謂之周金
剛温州安禪師得法於天台首閱楞嚴了義時謂之安
楞嚴二師纔了一經已足超詣矧博通三藏者乎如白

之哀集經律論諸書包涵萬有覺悟羣迷使人隨取隨足其用心固勤矣雖然凡聞是藏閱是經曾知夫經自佛口中來藏從人心上轉天宮有此法輪人心亦有此法輪龍宮有此海藏人心亦有此海藏白合掌作禮曰聞子之說是人心藏心同一悟轉乃藏之無盡者也願勒石垂不朽故書以授是年重陽日記

種德堂記

世之肥其家昌其後未有不有積累來者積累者何培

植盛德之謂也德在乎身榮及乎子孫猶日月在乎天
而明及乎地球玉在乎山川而光被乎草木故劉賓客
有種德而芽乃生令子蘇藥城有種德之深不稼而穡
蓋粹氣紆餘必世乃成也燕都任德昌世享有堂曰種
德一日會翰林集賢諸老酒數行世亨乞文承旨唐公
學士劉公因屬筆於余昔人以種德名堂記之者多矣
如汪龍溪胡不以種木觀之百園之木其始數寸之藥
蔽日月擾雲霓者固已萌其中趙閑閑引十年之計樹

之以木百年之計種之以德爲善責報如持印券鑰合
取所寄物今世亨居闐闐閱市鄺不爲流俗所移輕利
重義聚書求師俾諸子學日與賢士夫相往還篤行有
聞洗心向善由劉蘇之語驗汪趙之理庶乎其德萌矣
苟封之而不闕滋之而不槁蟠根深而垂蔭廣他日貽
祉相承秀民踵出榮其鄉里者是種德之報也彼孳孳
爲利不知德為何物而或金紫驚人此朝華之草夕而
零落又豈知余以德喻木之說余之說乃歲寒之松栢

也世亨可不勉旃

肯堂記

人倫之道父作爲重子述爲尤重賢者能繼其志不肖者不能也周書以庶邦不肯伐三監之叛故曰厥子乃弗肯堂矧肯構謂父致其規模子不基址况立屋乎由是天下後世公侯卿大夫通作克紹與否之喻非特爲有國者設雲間衛謙有山其先水北公無恙時擬築所居西偏爲燕閒之所志未畢而歿六年有山構堂三間

名之以肯提刑胡紫山既書復請余記前輩有言為常
人子孫易為名公子孫難常人之後人不責脩但守常
蹈故稍進善則必名名公之後人所共指苟不自振立
則何以滿衆望水北余舊識由門閥起身郡國號循吏
鄉里稱善人才德兼全者也有山強學力行克世其業
餘且不必論如義塾之米義莊之錢一粒一字皆有歸
家山之木家園之竹一株一竿畧無損與夫三食之輩
萬不侔矣余嘗造其居見左琴書右筆硯坐討論之碩

儒來饑寒之貧士而已堂雖不負仍有問焉專事挾持
猾徒惡黨得登茲堂乎登則非肯也擅生是非讒夫謗
客得游茲堂乎游則非肯也素嗜沉湎狂朋狎友得聚
茲堂乎聚則非肯也固知有山方返問之不暇亦不可
不勉

貢舉堂記

聖上嗣登大寶之初詔天下議行貢舉南北士子無不
喜適松江郡學魁星樓基新堂成某因以貢舉名既書

府教授馬允中等復請記乃志其喜而申其義貢舉之
設蓋始於魏盛於唐實賓興之遺意科目之良法國家
崇高儒術自戊戌一試後嘗垂意取士之科時時梗其
議而止今天語丁寧臣心協贊以人材為第一義雖鄉
舉里選未易復如明經如宏辭如詩賦義論策次第舉
行特反掌然則向之私議又安得齟齬於其間松江古
華亭凡陸鄉之英顧黨之秀及鄰境之俊異有能體朝
廷之意振學校之風吐江山之氣擬星斗之文游於斯

聚於斯發鄉薦於斯將見躍龍門擢虎榜視此堂為飛
梭之壁爲登雲之梯何患乎不騰達嘻今日之堂即前
日之樓其成壞顯晦固似不侔至於陰相默議與時表
裏使斯文一脉不絕非魁星降靈而何是知樓亡而堂
堂中之星亦未嘗不芒學者其無忘屋共十有一間經
始昭陽大荒落之南至畢工闕逢敦牂之重陽元貞元
年四月某日朝列大夫松江府知府兼勸農事張某記
并書

西湖書院記

西湖在天下三曰潁曰許曰杭皆有之名天下莫杭若
蓋地靈人力交相勝也余知松江之三年登郡西南放生
亭基基在水中央問其水此西湖也竊惑而考諸志
西湖乃瑁湖晉為陸氏養魚池宋為放生池或傳此即
谷水水有丹砂常湧五色泉郡人士見者必擢第指為
風水第一處裴回久之方府治撤真聖樓遂命工掇三
間增四廈而樓其北分八楹列五架而廡其西東低兩

挾起中央而門其南如蜃之吐黿之負龍之居突兀於
波光潋灩中孰不爭覩而願游之既成矣余謂是郡由
混一以來吾夫子燕居無所春秋社稷無所顧陸名賢
祠宇亦無所于是樓之上以像燕居庭之中以壇社稷
廡之左以位名賢廡之右以舍師儒與諸生乃榜曰西
湖書院既名矣有疑者問焉向謂三西湖皆不及杭誠
古今確論今杭有西湖松江亦有西湖杭有西湖書院
松江亦有西湖書院是四其三者乎二其一者乎杭有

三賢堂松江亦有先賢堂杭無社稷壇松江有社稷壇
是規模果同乎果不同乎余應之曰比淡粧濃抹之西
子生吸光飲淥之吳儂訪梅孤山問柳蘇堤抵畫橋橫
彩舫載歌舞而留宴賞固彼有而此無倚九山照海之
書堆環四塔插天之文筆市聲隔岸樓影壓波吐雄文
揮傑句呼清風而嚙明月亦彼無而此有且杭雖大不
湖而城松江雖小不城而湖使教養日興人材輩出不
害其爲四西湖而西書院之稱至若奉先聖于斯祀先

賢于斯而又祭土穀於斯正學者禮義誠敬所當務可
不知韓昌黎所謂自天子至郡邑守長通得祀社稷與
孔子及古之鄉先生沒而祀于社者遺意也復奚疑疑
者語塞而去因筆之為記始元貞元年四月畢八月莆
士陳宏董其後買地之貲一萬八千木瓦之費共二十
萬有奇來者其勿壞是年中秋日立朝列大夫松江府
知府兼勸農事張之翰記并書篆中議大夫松江府達
魯噶齊勸農事尼雅斯拉迪音承直郎同知松江府事阿達

納承務郎松江府判官傅大有提領按牘張濟邊汝翼
同立

